
Zenički *Filozofski café*

Odnedavno grad Zenica je dobio svoju *agoru* o čemu svjedoči serija javnih predavanja pod nazivom *Filozofski café* upriličena od strane Udruženja za filozofiju i društveno-humanistička istraživanja *Eidos* u kafe-baru *Bonaparte*, poznatom okupljalištu mladih u zeničkoj Staroj čaršiji. Cilj *Filozofskog caféa* je „izmještanje“ filozofije iz sigurnih okvira fakultetskih katedri i školskih klupa u polje živućeg svijeta i iskustva, gdje ona, između ostalog, prirodno pripada. Taj poduhvat uveliko podsjeća na Stare koji su raspravljali o filozofskim problemima na pijaci i trgu, na agori, pa je ideja cijelog projekta afirmacija znanja i pokušaj da se filozofija izvuče iz bjelokosnih kula i stavi pred javnost.

Seriju javnih predavanja otvorio je prof. dr. Željko Škuljević u majskom predavanju pod naslovom *Zašto filozofija?* On je ukazao na specifičnost filozofije u odnosu na sve druge znanosti koje se ne bave onim suštinskim, odnosno životom i čovjekom. Problem definiranja filozofije istaknut je sa oprezom i dat u jednoj otvorenosti i mogućnosti vlastitog promišljanja i određivanja filozofije.

U drugom, junskom predavanju, mladoj publici se obratio prof. dr. Spahija Kozlić s temom Čovjek – filozofski ocr. U njemu je ukazano na pojam čovjeka uopće i suvremenu opasnost da se on poima reducirano na samo jednu od njegovih brojnih dimenzija. Drugim riječima, čovjek je prije svega mnoštvo horizonata, potencija koja rasprostire ljudsko bivanje u brojne mogućnosti

kao biće spoznaje, društveno-djelujuće, stvaralačko, vjerujuće...

U septembarskom predavanju *Filozofija Istoka* prof. dr. Nebojša Vasić govorio je o problemu određivanja pojma Istok, odnosno o specifičnosti istočne duhovnosti u odnosu na zapadnjačku, posebno imajući u vidu tradicije kineske i indijske duhovnosti kao najstarije i najuticajnije. *Filozofija istoka* razumijeva se kao mudrost života gdje onaj koji ljubi mudrost treba da je živi.

U četvrtom novembarskom predavanju *Postmoderna* doc. dr. Bernard Harbaš govorio je o najaktuelnijim problemima filozofije koji muče naše vrijeme. Naime, postmoderna se javlja kao svojevrsni „projekt“ koji dovodi u pitanje sam sistem i temelje moderne donoseći vrlo smjelu kritiku apsolutnih istina i svih mjerodavnih standarda uspostavljenih u moderni i to na svim poljima ljudskog bivanja, od filozofije i umjetnosti, do kulture uopšte.

Stavljajući u prvi plan razgovor i dijalog pokretači *Filozofskog caféa* pokušali su srušiti stare mitove o odvojenosti teorijske filozofije od života, o njenoj zatvorenosti i nepraktičnosti. To da je filozofija ipak život i jedna vrsta prakse pokazala je ova serija predavanja koji su bili dobro posjećeni i gdje se uvijek tražila „karta više“. Organizatori su najavili nastavak aktivnosti i naredne godine s novim temama iz područja estetike, etike, ontologije, filozofije prava, političke filozofije i teorije kulture.

Senad Arnaut